



# ज्वजलपा वाःवो

JWOJALAPA NEPALBHASA WEEKLY

दं ६ ल्या: ४२ (पूर्णङ्क ९४) ने. सं. ११३६ बज्जलाश्व दुतिया आइतवा: २०७३ वैशाख २६ गते आइतवार (May- 08, 2016)

मू ८।-

## समावेशी संचार नीतिया नितिं मंका: स:

समाचार डेस्क, समाचारया विषय व भाषाया सवालया समावेशी  
जुइमा:गु नेवा:, जनजाति नापं मधेसी पत्रकारया मंका: माग



### ज्वजलपा वा:पौ/

सरकार समावेशी संचार नीति दयेकेगु नितिं नीस्वंगु समावेशी संचार उच्च स्तरीय सुभावा समितिया सरोकारवालातयूत व्वना नेवा: पत्रकार राष्ट्रिय दबूपाखें शनिवा: त:जिक अन्तर्क्रिया ज्याभ्व: या:गु दु। यलया सातोआकी भवनयू जूगु अन्तर्क्रिया ज्याभ्वलयू न्ववानादीपिं नेवा: पत्रकारनिसें

आदिवासी जनजाति, मधेसी व मिसापिं पत्रकारतयूसं तर्क आ:या अवस्थायू समावेशी संचार नीतिया नितिं मंका: कथं न्ह्या वनेमा:गु खँय व: वियादीगु दु। नेवा: पत्रकारतयूगु राष्ट्रिय संगठन नेवा: पत्रकार राष्ट्रिय दबूया केन्द्रीय नाय: श्रीकृष्ण महर्जनया नाय:सुइ न्वकू मीरा राजभण्डारी न्ह्याकादीगु उगु ज्याभ्वलयू मूछ्याञ्जे सुनिल

महर्जन लसकुस न्वचू वियादीगु ख:।

महर्जन समावेशी संचारया सवालया सरोकारवालातलिसे सहलह ब्याका न्ह्या: वनेमा:गु जुया हे उगु कथंया सहलह मुँज्या यानागु ख: धयादिल। अथे हे ज्याभ्वलयू न्ववायेगु भ्वलयू सन्ध्या टाइम्स न्हिपौया सम्पादक सुरेश किरण मानन्धर आ:या अवस्थायू समावेशी धइगु

विषयसं समावेशी व समाचार डेस्कयू समावेशी धयाच्वंगु अवस्था ख:सा मूल रुपं भाषाया सवालया नं समावेशी जुइमा: धका: धयादीगु दु।

राज्य भाषाया सवालया समावेशी यायेगु नितिं थीथी राष्ट्रिय संचार माध्यमयात स्थानीय मातृभाषापाखें नं तँसापौया रुपयू पिकायेकेत ह:पा: बिइगु कथंया व्यवस्था यायेमा: धयादिल।

अथे हे समावेशी संचार उच्च स्तरीय सुभावा समितिया दुज नापं प्रेस काउन्सिलया दुज: सुभेच्छा विन्दू समावेशीताया सवालयात कया थ:पिन्सं भूमिका म्हिता वयाच्वनागु दु धयादिसें सकलें जाना वनेमा: धयादिल। अथे हे सुभावा समितिया दुज: नापं मधेसी पत्रकार समाजया नाय: मोहन सिंह समावेशीयातया सवालयात कया आदिवासी जनजाति, मधेसीनिसें उत्पीडित

समुदायया पत्रकारत छप्पं जुया वनेमा: धका: व: वियादिल।

उगु हे कथं सुभावा समितिया दुज: नापं आदिवासी जनजाति पत्रकार महासंघया नाय: दण्ड गुरुङ समावेशी संचार नीतिया नितिं थ:पिं निरन्तर रुपं न्ह्या: वनाच्वनागु ख: धयादिसें मदिकक वनेगु जुइ धयादिल। वयूक:पि. स्वम्हेस्यां नं समाचारया विषयसं समावेशी, समाचार डेस्कयू समावेशी व भाषायू समावेशी जुइमा:गु खँय व: वियादिल।

अथे हे गोरखारपत्र न्हिपौया सम्पादक पुष्करभक्त माथेमां समावेशीया सवालयात कया सकलें नापं जाना वनेमा:गु नापं थ:पिनिगु समुदायया नितिं थ:पिन्सं नं मा:गु कथंया भूमिका म्हितेमा: धयादिल।

अथे हे वयूकलं गोरखापत्र न्हिपौपाखें समावेशीया नमुना कयनाच्वंगु दु धका: तर्क धयादिल।

ज्याभ्व:या दक्ले लिपा नेवा: पत्रकार राष्ट्रिय दबूया नाय: श्रीकृष्ण महर्जन समाचारया विषय वस्तुइ समावेशी, समाचार डेस्कयू समावेशी अले भाषायू समावेशीताया विषययात दुथ्या: अन्तर्क्रियां व:गु लिचव: कथं धका: उच्चस्तरीय सुभावा समितियात वइगु सोमाव: तकया दुने ज्ञापन पौ ल:ल्हायेगु जुइ धयादिल।

सोमवा: हे समावेशी संचार उच्चस्तरकीय समितिपाखे. न्हापांगु प्रतिवेदन तयार याइगु जुया हे थ:पिन्सं अथे सोमावा: हे माग पौ बिइगु जुइ धका: महर्जन धयादीगु ख:।

पत्रकारतयूसं थ:थ:गु विचा: नं प्वकादीगु उगु ज्याभ्वलयू नेवा: पत्रकार राष्ट्रिय दबूया केन्द्रीय दुज:पिं नापं यँ, यल, ख्वप कचाया आपालं नेवा: पत्रकारतयूगु सहभागीता दुगु ख:।

तपाईको टोलमा भएका घटना कीर्तिपुरको समाचार बनाउने हो भने तपाई एक कल फोन गर्नुस् हामी तपाईको टोलको समाचार कीर्तिपुरको समाचार बनाईदिनेछौं

कीर्तिपुरको  
चित्रण



किपुलिं पिदनाच्वंगु कीर्तिपुर सन्देश वा:पौ व ज्वजलपा: वा:पौया ग्राहक जुइगु नितिं स्वापू तयादिसँ

कार्यालय: निखासी टोल: कीर्तिपुर नपा-३  
फोन नं.: ४३३३००७, ९८४९४०९०७७

ज्वजलपा वा:पतिइ छिगू चिनाखँ/बाखं/हाइकू  
विज्ञापन व मेमेगु च्वसू पिथनेगु जूसा जिमित  
स्वापू तयादिसँ

सकलसिगु मंका: स:



ज्वजलपा वाःवो

ज्याकू: निखासी त्वा: किपू नपा-३ फोन ल्या: ४३३३००७,  
९८०८६२६४२० ई-मेल : kirtipur\_sandesh@live.com



# ज्वजलपा वा:पौ

सल्लाहकार  
श्रीकृष्ण महर्जन  
प्रकाशक:

नजरराम महर्जन  
सम्पादक

श्रीकृष्ण तण्डुकार  
ले-आउट:

ज्वजलपा डेस्कटप  
संवाददाता

भरत महर्जन, निरजमान सिंह  
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४१४०१०७७

ई-मेल : kirtipur\_sandesh@live.com

## सम्पादकिय

## नेवा: पत्रकार राष्ट्रिय दबूया जिम्मेवारी अप्वल

वंगु वैशाख ११ गते किपुली जूगु नेवा: पत्रकार राष्ट्रिय दबूया निक्वःगु तःमुज्यां न्हूगु ज्यासना पुचः ल्यःगु खः । गुलिं पदय् निर्विरोध जुलसा गुलिं पदय् लोकतान्त्रिक विधिकथं चुनाव जुयाः त्याकावःपिं नं दु । थुगु कथं न्हूगु जिम्मेवारी ज्वनाःवःपिं पदाधिकारीपिन्त नेवा: ख्यःया यक्व संघ संस्था विश्वास यानाः थातुं थासय् लसकुस व सम्मानया ज्याभवः नं न्ह्याकाः हःगु दु ।

दकलय् न्हापां नेवाःतयगु राष्ट्रिय संगठन दे दबू नं थःगु ज्याकुथी लसकुस व सम्मानया ज्याभवः यात । अथे हे म्हिरः शनिवाः हे निगू संस्थां लसकुस व सम्मानया ज्याभवः यात । नेपालभाषा संकिपा कःमिपिनि पाखें सिटि म्याक्स बागवजारय् सम्मानया ज्याभवः यात सा वहे दिनय् हलिं नेवा: गुथिं नं नेवा: पत्रकार राष्ट्रिय दबूया न्हूगु ज्यासना पुचःयात लसकुस व सम्मानया ज्याभवः यात । अथे हे थौं आइतवाः ज्यापु समाज यलं लसकुस व सम्मान याइगु ज्याभवः दु ।

थुगु कथं सकसैनं लसकुस व सम्मान याःगु थासय् वनां सम्मान कयाः वयेधुंकाः नेवाःतयगु ख्यलय् नेवा: पत्रकारपिन्सं ग्यसुलाःगु ज्या यायेत बाध्य जूगु दु । सकसैनं स्यू, थौया युगय् संचार ख्यःया महत्वपूर्ण भूमिका दु । छगूकथं राज्यस्तरं हे बहिस्करणय् लाकाःतःपिं नेवाःतयगु विचाः, गतिविधि हलिन्यंक प्रचार प्रसार यायेगु नितिं नेवा: पत्रकार राष्ट्रिय दबू नं महत्वपूर्ण भुमिका म्हिती धइगु आसा यानाः हे वय्कःपिन्त थःपनिगु नं समर्थन व ग्वाहालि दइ धइगु भलसा बिइत हे थुज्गु सम्मान ज्याभवः याःगु जुइमा । उकिं पत्रकारपनिगु जिम्मेवारी नं अप्वः जूगु वाः चायेकेमाः ।

## साहित्य/चिनाखं

## हाईकू शौरभ शाक्यया

### शौरभ शाक्य

खप

६१. छ वने धुंका  
न्त्यलं दु मकाल जि  
हाइकु भुमिं ।  
६२. छ मवगुलिं  
ई न्ह्यागुनं मचाल  
मन इ इ पं ।  
६३. फुस्लगु आस  
थिक थिक पं भुटमाली  
लतंमय् का स्वः ।

६४.सितिंवंगु चाः  
तर्कनाया संसार  
भुलुसुलु दं ।  
६५.लखय् दुबिना  
माधव नारायण  
शंख पुयेवं ।  
६६.ख्वहरे खुसि  
चिकुलं थरर खा  
ख्वाउँया हा ब्व ।

## नेवा: देय् दबूया भविश्य



### श्रीकृष्ण महर्जन

नेपा: न्यंकंया थ्यंमथ्यं १३ लाख नेवाःतयगु मंकाः संगठन नेवा: देय् दबू खः । थनि स्वदै न्ह्यःनिसें नेवाःतयगु राष्ट्रिय संगठन नेवा: देय् दबू अन्यौलता लानाच्वंगुलिं नेवाःतयगु मुद्दानिसें हक अधिकारया सवालय् अलमल जुयाच्वंगु खने दु ।

तत्कालिन अवस्थाय् थनि स्वदै न्ह्यः नेवा: देय् दबूया खुक्वःगु तःमुज्या यें जूगु खःसा तःमुज्याया भवलय् विधान संशोधन पारित यात अले पुलांगु विधान कथं न्हूगु नेतृत्व ल्ययेगु ला कि न्हूगु विधान कथं ल्ययेगु धइगु विषययात कया तःमुज्याय् हे विवाद जूगु खः । विवाद भ्रन भ्रन तच्चया वंगुलिं अन्ततः तःमुज्या हे स्थगित यायेगु ज्या तर्क जूगु खः । थ्व हे दथुइ विशेषयाना स्विनिगःया नेवा: खलः पुचःया प्रतिनिधित्व जाना दबाव समूह याःगु खःसा अनं लिपा दबाव समूहपाखें जिल्ला प्रशासन ज्याकुथिइ निवेदन तयेगु ज्या तर्क जूगु खः ।

अनं लिपा लगातार रुपं हे देय् दबूया समस्या ज्यंकेगु नितिं धकाः नेवा: पत्रकार राष्ट्रिय दबूनिसें थीथी ब्यक्तित्वपिन्सं कुतः याःगु जूसां नं समाधान मजुल । ता ई लिपा अन्ततः पदमरत्न तुलाधरया नेतृत्वय् सहजीकरण पुचः दयेकेगु ज्या जूगु खःसा व हे सहजीकरण पुचलं ता ई तर्क कुतः याना लिपा मस्यौदा विधान दयेकेगु ज्या तर्क जूगु खः ।

स्वदै तर्क अन्यौलताय् लानाच्वंगु अवस्थाय् सहजीकरण पुचःयात विधान मस्यौदा तयारी पुचःया रुपय् हिलेगु ज्या जूगु खःसा अन्ततः वंगु छुं दिं न्ह्यः जक चितवनय् विधान अधिवेशन क्वचाःगु दु । विधान अधिवेशनं नेवा: देय् दबूया न्हूगु विधान पारित याःगु खः । न्हूगु विधान पारित नाप नापं कार्तिक महिनाया दुने खुक्वःगु तःमुज्या याना न्हूगु नेतृत्व ल्ययेगु नितिं धकाः स्वम्हेसिया निर्वाचन मण्डल तर्क घोषणा याःगु दु । निर्वाचन मण्डल घोषणा याःगु

अले कार्तिक महिनाया लिपांगु वाः तकया दुने दाङ जिलाय् खुक्वःगु तःमुज्या याना न्हूगु नेतृत्व ल्ययेगु धकाः तर्क घोषणा जूगु ल्याखं स्वल धाःसा आः कार्तिक महिनाया दुने नेवा: देय् दबूया न्हूगु नेतृत्व वइगु अले नेवाःतयगु मुद्दायात लिवाक्क जूसां नं नेवा: देय् दबूपाखें सशक्त कथं ल्हवनी धकाः आशा यायेथाय् दु । छुं नं कथंया पंगः मवल धाःसा अवश्य नं वइगु कार्तिकतकया दुने न्हूगु नेतृत्व नेवा: देय् दबुलिइ वइगु निश्चित दु धाःसां छुं पाइमखु ।

आः न्हूगु नेतृत्व ल्यइगु धइगु न्हूगु हे विधान कथं खः । न्हूगु विधान धायेवल्य् आः नेवा: देय् दबू संघीय संरचना नापं एकात्मक संरचना नापं याना निगू हे संरचायात नाला वनीगु अवस्था दु । न्हापा न्हापा थें त्वाः त्वालय् दुगु थीथी कथंया खलः पुचःयात नं दुथ्याके फइगु अले खलः पुचः मदगु स्विनिगःया थीथी लागाय् नेवा: देय् दबूपाखें हे थीथी लागा स्तरया नेवा: देय् दबू दयेकातःगुयात प्रारम्भिक कमिटीया रुपय् नाला खलः पुचःया हे हैसियत बिया सहभागीता याकीगु जूगु दु ।

अथे नेवा: देय् दबूपाखें दयेकातःगु थीथी स्तरया कचायात नापं जिल्लाया खलः पुचःया नं दुथ्यका आः नेवा: देय् दबूया जिल्ला अधिवेशन यायेमालीगु अवस्था दु । उकिंया अर्थ नेवा: देय् दबूया कार्यकारणी अधिकार दुगु आधिकारीक तह केन्द्र छगू खःसा आः जिल्ला तह नं दइगु जूगु दु ।

जिल्लाया अधिवेशनपाखें हे केन्द्रीय महाधिवेशनया नितिं प्रतिनिधित्व ल्यया हयेगु ज्या जुइ । न्हापा न्हापा जूसा तप्यंक हे खलः पुचःपाखें तःमुज्या अर्थात महाधिवेशनय् प्रतिनिधित्व याइगु खःसा आः जिल्लापाखें ल्ययाः वयेमालीगु अवस्था ब्वलंगु दु । उकिं कार्तिक मसान्त तकया दुने देय् दबूया खुक्वःगु तःमुज्या यायेगु नितिं वसिवें न्ह्यः हे फुक्क जिल्लाया अधिवेशन क्वचायेकेमालीगु अवस्था दु ।

अथे हे मुलुकया न्हूगु संविधान संघीयताय् वने धुंकूगु अवस्था अले न्हयगू प्रदेश दयेके धुंकूगु अवस्थाय् छाया हाकनं जिल्ला तह दयेकेगु ज्या जूगु खः धकाः न्हयसः नं मवःगु मखु । न्हयगू प्रदेशया न्हूगु संविधान ला जारी यात तर सिमानायात कया विवाद जुयाच्वंगु, प्रदेशयात कया विवाद जुयाच्वंगु नाप नापं राज्य तर्क न्हयगू प्रदेशया संरचना कथं न्ह्याः वनेगु ज्या याना मच्वंगु अवस्थाय् पुलांगु हे

संरचनाया आधारय् न्ह्याः वनेमाः धकाः विधान अधिवेशय् वःपिं अप्वः प्रतिनिधितयगु मत जूगुलिं हे अथे पुलांगु हे राज्यया संरचनाया आधारय् वंगु खः । न्हयगू प्रदेशया अवधारणा कथंया संरचना दयेकेगु ज्या जुगु जूसा राज्यं हे संरचना मदयेकूनिगु इलय् नेवाःत छपला न्हयचिल अले न्हयगू प्रदेशयात नेवाःतयसं स्वीकार यात धकाः संदेश वनीगु खः । उकिंयात ध्यानय् तया विधान अधिवेशनय् प्रधनिधित्व यानादीपिन्सं पुलांगु हे संरचनायात आधार कया विधान संशोधन याना पारित यायेगु ज्या याःगु खने दु ।

अथे हे थुगुसीया विधान अधिवेशनं नेवा: दुनेया ज्यापु महागुथि, मानन्धर संघ, बज्राचार्य समाज, दःला समाज, स्वस्थः समाज, नापित समाज, उदाय समाज, शाक्य समाज, खड्गी सेवा समितिनिसें थीथी कथंया थ्यंमथ्यं निगू दर्जन जातीय संगठनयात दुथ्याका जातीय सभा दयेकेगु धकाः नं पारित याःगु दु । जातीय सभाय् जातीय संगठनया केन्द्रपाखें प्रतिनिधित्व याइ । इमिसं तप्यंक हे नेवा: देय् दबूया तःमुज्या तप्यंक हे ब्वति काइगु व्यवस्था याइ । अले जिल्ला स्तरया जातीय संगठन जुल धाःसा जिल्ला अधिवेशनय् प्रतिनिधित्व याना केन्द्रीय महाधिवेशनय् सहभागी जुइगु अवस्था दु । थुगु कथंया विधानय् व्यवस्था याःगु दु । उकिं नेवा: देय् दबूया न्हूगु विधान कथं आः जुइगु तःमुज्या न्हापा लिपाया तःमुज्यासिवें नं हिउपाः खने दइगु अवस्था दु । अले जिल्ला स्तर तर्क दइगु जुया नेवा: देय् दबूयात न्ह्याकेत अपुइ धकाः मनूतयसं अनुमान यानाहःगु दु । अले स्विनिगलं पिनेया जिल्ला जिल्लाय् थीथी खलः पुचःत दुगु अले इपिं छथाय् हे च्वने मफयाच्वंगु अवस्थाय् नेवा: देय् दबूया जिल्ला समितिपाखें छगू हे थासय् तये हइगु अवस्था वइ उकिं देय् दबू न्हापासिवें नं सशक्त कथं न्ह्याः वनेफइगु अवस्था ब्वलनी धकाः आशा यायेथाय् दु । स्विनिगलय् नं जिल्ला स्तरया समिति दइगु अवस्थाय् त्वाः त्वालय् च्वंगु खलः पुचःयात छगू हे थासय् तये हयेगु ज्या जुइगु नापं आः नेवाःतयगु दथुइ जिल्ला स्तरया नेतृत्व विकास जुजुं हे केन्द्रीय स्तरया नेतृत्व नं विकास जुइगु अवस्था वल धकाः धायेफइ । उकिं देय् दबूया न्हूगु विधान वःगुयात सकल नेवाःतपाखें सकारात्मक रुपं कया नेवा: मुद्दा ल्हवनेत, नेवा: भाय्, कला संस्कृतिया नितिं देय् न्यंकंया नेवाःत छगू हे थासय् च्वनेगु हवःताः वःगु दु धकाः तायेका संगठित जुया वनेमाःगु आवश्यकता जूगु दु ।





## पाँगाय् मिखा शिविर व ज्येष्ठ नागरिक पित्त मांया खा: स्वकल



नेपाल नेत्र संघ व नेपाल भारत मैत्री संघया ग्वाहालिं, ज्येष्ठ नागरिक सेवा केन्द्र पाँगा व कीर्तिपुर सामुदायिक स्वास्थ्य केन्द्र (जनपोलिक्लिनिक)या ग्वसालय वंगु वैशाख २३ गते विहिवार पाँगाया लाछि मिखा शिविर न्ह्याकूगु खः। उगु शिविरय् १९० म्हसें मिखा जाँचय् याकूगु खः। सकसित नं बासः सितिं इनाःव्यूगु दु। अपरेसन याःमाःपित्त निशुल्क अपरेसन नं यायेगु व्यवस्था दुगु राजेन्द्र महर्जनं कनाःदिल।

ज्येष्ठ नागरिक सेवा केन्द्र पाँगां लाछिया नासः छः भवनय् न्हिनय् ज्येष्ठ नागरिकपित्त वैशाख ५ गतेनिसं न्हिनय् मुंकेगु याना वयाच्वंगु खः। अथे हे वंगु वैशाख २४ गते शुक्रवार मांया खाः स्वयेगु दिखुन्हु नं सकलें मुनेधुंकाः अन हे मातृ दिवस हनेगु यात। निगः केक मिर्जापिनिपाखें थकालिमह जितलाल महर्जन व मिसा पिनिपाखें थकालिमह नकिं न्हुछेमाया महर्जनं मंकाः केक तानाः मातृदिवसया उलेज्या यानादिल। मुक्कं ६७ मह दुगु उगु थासय् सकसित नं धौसगं, मिठाई व फलफुल बियाः मांया खाः स्वकेगु ज्या याःगु खः। उगु इलय् सकसित नं थःमांया खाः लुमंकेत छगू मिनेटया मौन धारण नं याःगु खः।

ज्येष्ठ नागरिक सेवा केन्द्रया थुगु सेवां यानाः यक्को हे ज्येष्ठ नागरिकपित्तं स्वस्थता महसुस यानाः हःगु दु। न्हिच्छि अन वने थन वने मदयाः न्हिच्छि न्हिच्छि कोठाय् च्वनां वा फलय् च्वनाः म्हाइपुक हिं छयायेमाःपिं मिसा, मिजं ज्येष्ठ नागरिकपिं आः सेवा केन्द्रय वयाः न्ह्याइपुक हिं छयाये दुबले मानसिक स्वस्थता, अले थीथीकथंया शारिरीक व बौद्धिक कासा नं म्हितकीगु जुइगुलिं दिमागी सन्तुलन नं बांलाना वःगु दु। केन्द्रय वयबलय् पुचः पुचः मुनाः खँलाये दइगु अन हे च्या, विस्कुट, पाउरोटी नं नकाः छवइगु जूगुलिं सकलें लय्ताः।

वैगु वैशाख ३१ गते शुक्रवार ज्येष्ठ नागरिकपित्त क्वय्नाय् चाहिइके यनेगु खँ ज्येष्ठ नागरिक सेवा केन्द्रया नायः दुर्गा महर्जनं कनाःदिल। अन वनेगु लागि बस (सवारी साधन) कीर्तिपुर यातायात सेवाया बसया व्यवस्था महेश्वर महर्जनं यानादीगु जानकारी बियादिल।

## नेपालभाषा संकिपा कःमिपित्तं नेवाः पत्रकारया न्हूगु ज्यासना पुचःयात लसकुस व सम्मान यात



वंगु वैशाख ११ गते जूगु नेवाः पत्रकार राष्ट्रिय दबूया निक्कःगु तःमुंज्यां गठन जूगु न्हूगु ज्यासना पुचःयात नेपालभाषा संकिपाः कःमिपित्तं बागबजारय् च्वंगु सिटी म्याक्स हलय् लसकुस व सम्मानया ज्याभवः यात। नेपालभाषा संकिपा कःमिपित्तगु संस्थाया अध्यक्ष सुरेन्द्र तुलाधरया सभापतित्वय् जूगु उगु सभा संचालन सचिव पवन जोशी न्ह्याका दिइगु खः।

नेपालभाषा संकिपाकःमिपिं व नेवाः पत्रकारपित्तगु दथुइ बांलाःगु स्वापू नं निगू ख्यलं नं थःथःगु लागं छम्हं मेम्हसित ग्वाहालि जुइगु आशा नायः सुरेन्द्र तुलाधरं प्वंकाः दिल। उगु ज्याभवलय् नेपालभाषाया संकिपा तितिकः महाविकः संकिपाया कलाकारपित्त नं हनेगु ज्या याःगु खः। अथे हे तितिकः महाविकः फिल्म वइगु जेठ २२ गते दच्छि यंक न्यायेका वयाच्वंगु नेपालभाषा संकिपा महोत्सव अन्तर्गत क्यनीगु नं जानकारी बियादिल।क

## किपुली संघीय गठबन्धनया कोणसभा व पर्चा वितरण ज्याभवः

“जेठ २ गते सिंहदरवार घेरय् यायेनु, नेवाः शक्ति ब्वयेनु” धैगु आह्वान यानाः संघीय गठबन्धनं म्हिगः सनिवाः किपूया पाँगा दोबाटोय् कोण सभा व पर्चा इनेगु ज्या क्वचायेकल।

उगु कोण सभाय् सरल गोपाल महर्जन– ज्यापु महागुथि किपू नगर समितिया छयाञ्जे, दुर्गा ओखोबो –संघीय लिम्बुवान, कृष्णहरि महर्जन– नेपाः राष्ट्रिय पार्टी, सुन्दर कुमार लिम्बु, संघीय लिम्बुवान काठमाडौं जिल्ला इन्चार्ज, नजरर



ाम महर्जन–संघीय समाजवादी नेवाः प्रदेश केन्द्रीय सदस्य, आडकामी शेर्पा – शेर्पा प्रदेश केन्द्रिय सदस्य, मनरत्न शाक्य संघीय समाजवादी जिल्ला अध्यक्ष पित्तं न्वंवानादीगु खः।

वय्कःपित्तं नेपाःमि जनता लोकतन्त्र, स्वतन्त्रता, धर्मनिरपेक्षता, समानता व सामाजिक न्यायया नितिं गुगु संघर्ष, त्याग व वलिदान यानागु खः। केन्द्रीकृत एकल जातीय निरंकश शासन विरुद्ध संघर्ष यानागु, प्यंगू दलया नेतातय्सं १६ बुँदे सहमति यानाः सकल जनतायात न्याल्ल ब्याँ यानाबिल। थी थी सरकारं आदिवासी जनजाति व मधेसीतनाप याःगु पहिचान सहितया प्रदेश संविधानय् दुथ्याकेगु सम्झौता सहमतियात हाकुतिना अन्तरिम संविधानं विइधुंकूगु अधिकार तं क्वपाला फाण्टट्रयाकया नामय् संविधान हयाः देय्यात प्रतिगमनया लॅपुइ यंकूगु धयादिल।

वय्कःपित्तं जनजाति, मधेसी लगायत समुदायया असहमति दयेक दयेकं हःगु संविधानं गुगु न्हयगु प्रदेशया हल उकि मध्ये २ नं प्रदेश छगू बाहेक फुक्क प्रदेशय् छगू जक पाहाडि ब्राम्हण समुदायया बहुमत दइगु कथं राज्यपुनर्संरचना यात। धर्मनिरपेक्षताय् नं परिभाषा धाकाः न्या बर्च्छि ब्याँ बर्च्छि याना जगत न्हिइकीगुखतं संविधान हल। न्हयगु प्रदेश मध्ये नेवाःतसें दावी यानाच्वंगु भूगोल दुथ्याःका हःगु ३ नं प्रदेशय् नेवाः तामाङ्ग व थारू भूभाग नं त्वाका थ्व समुदाय थ्व प्रदेशय् न्ह्यावले अल्पमतय् लाइगु तर पहाडी ब्राम्हण समुदायया प्रभुत्व न्ह्यावले ल्यनीकथं सिमांकन यात। थ्व एकल जातीय नश्लीय शासन न्ह्याका तयेगु षडयन्त्र जक खः। गन छगू जक जातीय समुदाय शासक मेपिं शासित जुयाच्वनेत बाध्य जुइ। थ्व हे जुया नेपाःया नेवाः लगायत आदिवासी जनजाति व मधेसी समुदाययात थ्व संविधान स्वीकार्य मजू। संविधानया मस्यौदा जारी जूगु इलनिसं जूगु विरोध संविधान जारी जुइधुंका नं जारी हे दनी।

वक्तापित्तं नेपाःमि जनतायात शोषण यायेगु केन्द्र जुयाच्वंगु सिंहदरवार पंचायती कालय् पंचत व लोकतन्त्र वयेधुंकाः कांग्रेस, एमाले व एमाओवादी नं सत्ताय थ्यंकाः शोषयात निरन्तरता हे बियाच्वंगु दु। थुकिया लिपांगु दसू ओली सरकार खः। ओली सरकार सिंहदरवारय् थ्यंकाः हाक्वजंयात प्रसय वियेगुनिसं जनताया करयात थः नेता व कार्यकर्तातय्त लाक्वपाक्व धेवा इनेगुनिसं करोडौं खर्च याना डिनर पार्टी बियाः नेपाःमि जनताया हिचःति म्हिताच्वंगु दु। उकिं थुकथं शोषणयात अन्त्य यानाः फुक्क समुदायया समानुपातिक समावेशी अधिकार वियेत सिंहदरवार हे घेरे यानाः आन्दोलन याये माःगु खः। थ्व आन्दोलनय् स्वनिगःया जनता नं जुरुक्क दनेमाःगु दु धयादिल।

वय्कःपित्तं पूर्व पश्चिम तराई मधेस हिमाल पहाडया लखौं जनता सिंहदरवार घेरे यायेत वइगु इलय् स्वनिगःया नेवाः लगायत फुक्क जनतां नं साथ बिया आन्दोलनयात निर्णायक तहलय् थ्यंकेमाःलि स्वनिगःया जनतायात नं शान्तिपूर्ण रुपं सिंहदरवार घेरे यायगु आन्दोलनय् ब्वति कयादीत इनाप नं यानादील।कककक





## जि नेवा: गज:म्ह



रामभोला महर्जन

जि नेवा: थ:गु छैय् धूं थें न्याम्ह  
पिने सकसियां न्ह्योने छुं थें न्याम्ह  
जिगु नां हारां छैय् च्वपिन्त ख्याइम्ह  
तमं लं मखना जा नये मखंम्ह  
जि नेवा: गज:म्ह ..... ॥  
म्योपिन्सं उचालेया:सा जि सगरमाथा च्वकाय् थ्यनिम्ह  
जि थ:गु नां पहिचान, संस्कृति तना वंसां मिखां मखनिम्ह  
जि देशया लागि राजननिती याइम्ह  
देसं हे पिनिना छवयेत संसां वा मचा:म्ह  
जि नेवा: गज:म्ह ..... ॥

थ:गु धेवा फुका समाज सेवा याइम्ह  
पिने च्वपिन्सं अतिक्रमण या:सां न्वंवाये मस:म्ह  
जि धर्म हे जय धका: छ: सिइमा जुइम्ह  
छ: हे खुया योंकुसां मसिउ पहलं वनिम्ह  
जि नेवा: गज:म्ह ..... ॥  
दाजु किजा ल्वा:थाय् दम तये स:म्ह  
पिनेच्वपिन्सं वया लुटय् या:सां ल्वाय् मस:म्ह  
जि व्वनातयाम्ह रमाजय स: सिउम्ह  
थ: व थथिति जक कतिलाके स:म्ह  
जि नेवा: गज:म्ह  
जि गरिबतय् स्वयेत कम्पूनिष्ट जुइम्ह  
थ: जक प्वा: जायसाथ न्ह्यो वय्कीम्ह  
मेपिन्सं फुर्केया:सा थ:थ: ल्याय् स:म्ह जि  
मेपिन्सं त्याका योंकुसां इमित हे जय जयकार यायेस:म्ह जि  
जि नेवा: गज:म्ह ..... ॥  
जि थ:गु लागाय् नेता धका: धया जुइम्ह  
थ: सिबय् क्वयाम्ह मन्त्री जुसां म्हुतुई धौ फिमह  
जि नेवा:तय्सं उन्नति या:गु स्वये मफुम्ह  
न्ह्याथे यानासां तुति ज्वना क्वय् सालिमह  
जि नेवा: गज:म्ह ..... ॥

## साहित्य/चिनाखं

## अले जक जनतां पत्या याई नत्र...



कवि राम महर्जन,  
नगां, किपू-१६

कथु गंक: भाषण जक बियां छु याय्  
जनताया छै छै रासन मदु  
मत मदु तोनेगु ल: मदु  
जनतायात मा:गु पेट्रोल ग्यास सहज मजुनी

उकिं जिगु बिन्ति दु नेता महोदय  
जनतायात भाषण मखु रासन मा:  
सम्बन्धित मन्त्रालयया कर्मचारीत नाप  
व्यापारीत मिलोमतो जुयाच्वंगु ख: ला ॥

नत्र आयागु अवस्थाय् बजा: भा:या  
अवस्था सहज जुइमा:गु ख:  
तर आ:तक सहज मजुसे  
बजा: भा: हाकुसे च्वनाच्वंगु दु ॥

जनताया समस्याय् छाया वास्ता मयागु  
थपिं नं सरकारे च्वनाच्वपिं हे ख:  
थ्व खं थुइका मा:गु व्यवस्था छाया मजुल  
सरकारयात घचघचय् याये ज्यूगु ख: ॥

देश दुने ब्वलना च्वंगु समस्या यात  
तप्यंकेगु ज्याय् सुयां चिन्ता मदु  
सरकारे सहभागी जुया च्वंसेली  
थुकिया जिम्मा सकसिनं काय्मा:गु ख:

फसा सरकारयात ठीक थासय् तयमाल  
मफुसा सरकारं पिहाँ वया जूसां  
जनताया समस्या समाधान याय्माल  
अले जक जनतां पत्या याई नत्र .....

## रेडियो उद्घोषण तालिम

रेडियो उपत्यका ८७.६ मेगाहर्जं व मातृ ससक्तिकरण समूहया सहकार्य कथं रेडियो उद्घोषण तालिम औपचारिक रुपं न्ह्या:गु दु । म्हिग:सनिवा: सुथय् नारायण परिवार क्लब, वन्दे टेकुइ जुगु उलेज्या ज्याभव:लय येँया क्षेत्र नं ८ या नेपाली कांग्रेस सांसद नविन्द्रराज जोशीं मूपाहाँ कथं उलेज्या यानादीगु ख: ।

समाजया नितिं परिवर्तन नेपालया खसाले जुगु ज्याभव:लय समाजया नाय: भगवति जोशी सभापति कथं ज्याभव न्ह्यागु खस उगु ज्याभवलय पाहाँ कथं रेडियो उपत्यकाया नाय: पुष्पराज पराजुली, नारायण परिवार क्लबया नाय: प्रचण्डमान बज्राचार्य, मातृ ससक्तिकरण समूहया नाय त्रिपुरा लक्ष्मी जोशी, रेडियो उपत्यका नेपालभाषा ज्याभव प्रमुख प्रज्वल शाक्य, रेडियो उपत्यका संचालक समिति सदस्यपिं नीर शाक्य व सन्तकुमार महर्जन नापं नारायण परिवार क्लबया सदस्य सचिव निरज कुमार महर्जन पाहाँ व्वना तगु ख: ।

उद्घोषण प्रशिक्षण निर्मल बज्राचार्य व विराजकाजी राजोपाध्याय पाखें जुइगु ज्यभवलय उद्घोस जुगु ख: । ज्याभवले सकल पाहाँ पित्त तालिम व्यवस्थापन व मातृ ससक्तिकरण समूह या सल्लाहकार बालकृष्ण महर्जनं खादा कोखायेका लसकुस यानादिगु खसा प्रमुख अतिथि पाखें तालिम सामाग्री हस्तान्तरण जुगु ख: रेडियो उपत्यकाया संस्थापक नाय व नारायण परिवार क्लबया पूर्व नाय चक्रमान डंगोल मदुगु ११ ला जुगुलिं वयेकया योगदानया लुमन्ती १ मिनेट मौन धारण यागु ख: ।



पाहाँ कथं भाया दिम्ह प्रज्वल शाक्य पाखें लसकुस न्वचु व रेडियो उपत्यका नेपालभाषा ज्याभवया वारे न्ह्यथना बिया ज्याभव न्ह्यागु ख:सा, पाहाँ कथं प्रशिक्षक पाखें विराजकाजी राजोपाध्याय न्वचु तालिमया महत्व वारे ध्वाथुइका दिगु ख: । अथेहे त्रिपुरा लक्ष्मी जोशीं मातृ ससक्तिकरण समूहया म्हसिका बियादिगु ख: । नारायण परिवार क्लबया नाय प्रचण्ड मान बज्राचार्य पाखें क्लबया म्हसिका व रेडियो उपत्यकाया वारे न्ह्यथना दिल अथेहे रेडियो संचालक समिति सदस्य नीर शाक्यं थगु अनुभव व तालिम स्यनामी पित्त भिन्तुना बिया दिगु ख: । मू पाहाँ नविन्द्र राज जोशीं तालिम ता:लायेमा धका सुवा बिया दिल अथेहे ज्याभवया नाय भगवति जोशीजुं तालिम यायेगुया महत्व न्ह्यथनादिल । ज्याभवया संचालन, उद्घोसन तालिमया संयोजक बिगेन तुलाधरं यानादिगु ख: । तालिम थ्व हे वैशाख २६ गते निसं लक्षि तक न्ह्याईसा तालिम दौरानय थीथी संचार गृह भ्रमण याकिगु जानकारी तालिम संयोजकं बियादिगु ख: ।

## किपुली विद्यालयस्तरीय क्रसकन्ट्री जुल



कीर्तिपुर खेलकुद विकास समाज, कीर्तिपुरया खसालय कीर्तिपुर व्यापी विद्यालयस्तरीय छात्र/छात्रा क्रसकन्ट्री प्रतियोगिता म्हिग: सनिवा: किपुली सम्पन्न जुल ।

किपू लागाया छगू दर्जनस्वयां अण्व: विद्यालयया करीव २०० म्ह विद्यार्थीतसं ब्वति का:गु ख: । नयाँबजारया पाँगा दोबाटों न्ह्या:गु उगु ब्वाज्या पाँगा धोकासी, विष्णुदेवी, भाजंगल, चोभा:

गेट, लेबोरेटरी स्कु, त्रि.वि. गेट तिनकुने जुया किपू ध्वाखाय् क्वचा:गु ख: ।

उगु कासाया उलेज्या कीर्तिपुर खेलकुद विकास समाजया सल्लाहकार प्रा.डा. श्यामकृष्ण महर्जनं यानादीगु ख: । उगु प्रतियोगिताय् छात्रापाखे सृजना ढाङ्गी (लेबोरेटरी न्हाप, दिक्षा श्रेष्ठ, पुष्प सदन ल्यू, ओमी लक्ष्मी भुजेल, राराहिल, ल्यूयाल्यू जूगु ख: ।

अथे हे प्रिदिना महर्जन राराहिल, रिया महर्जन मंगल, नविना आलेमगर राराहिल, प्रकृति राई लेबोरेटरी, सुभेच्छा रिजाल, ग्रिन भिलेज एजुकेशन फाउण्डेशन, मनिषा बुढामगर लेबोरेटरी व न्हुजला महर्जन पाँगा मा.वि. भिगूगु थासय् ला:गु ख: । छात्रपाखे भावेश तामाङ पुष्पसदन, न्हाप, रोहित लामा कीर्तिपुर मा.वि. ल्यू, लगन राई पुष्पसदन ल्यूयां ल्यू ला:गु ख: ।

दौड लिपा समाजया नाय: प्रदिप महर्जनया नाय:सुइ सिरपा: इनेगु ज्या जुल । मूपाहाँ प्रा.डा. श्यामकृष्ण महर्जनं विजयी खेलाडीपित्त मेडल, ट्रफी व दसिपौ ल:ल्हाना दीगु ख: ।क



# अन्धविश्वासय लिकुनाच्वंगु विज्ञान तलनिसे पिखालखुतक

## छस्वां बा पुइ मत्यः



(नेवा:तयसं न्हापांनिसं थये याये मत्यः अथे याये मत्यः धका: धया वयाच्वंगु दु। थौ वया उकियात अन्धविश्वास धायेगु या:। याये मत्यः धयात:गुया थीथी कार णत दु। उगु कारणयात कुला स्वयेगु ज्या यात धा:सा अन दुने विज्ञान दु। उकिं पन्नारत्न महर्जनं अज्व:गु हे अन्धविश्वासय लिकुनाच्वंगु विज्ञानयात कया सफू हे च्यादीगु दु। सं)

बं पुइगु धयागु बंय च्वंगु धू पुनाछवयेगु ख:। यचुपिचु यायेगु ख:। यचुपिचु यायेबल्य छै छ्वां यायेमा:। छै छ्वां बं पुइगुयात भिं व लछिन धायेगु चलन दु। थज्यागु चलन नं तलनिसें पिखालखुइतक छस्वां पुइ मज्यू धयागु मान्यता दु। छस्वां धयागु छफि जक तुफि छयला: बं पुइगु ख:।

छै भीगु आश्रय स्थल ख:। देनेगुनिसं नयेत्वने सकतां थन हे याइ। थज्या:गुया लागि छैया थीथी तं थीथीकथंया ज्याय छयलातइ। नसात्वैसा ज्वरय यायेगु भुतू व नयेत्वनेया लागि बहिग: तंय याइ। य क्वथा आदि नं थ्वहे तंय दयेकातइ। पिनेया मनूत काचाक्क थ्व तैतक थकाइ मखु। पिने न्ह्यानागु लाकां नं थ्व तैतक न्ह्यायेगु याइमखु। थुकथं थ्व तंया महत्व दयाच्वनी। मेमेगु तं नं थ:थ:गु

कथं महत्व दयाच्वनी। थये थ:थ:गु कथं महत्व दयाच्वंगु थीथी तंय बं पुइत छफिं जक तुफि छयला: पुइबल्य छथाय्या धू मेथाय नाप ल्वाक:वुक: जुइ। अझला पिने पुनांगु तुफि लातकि पिनेया फोहर नापं तलय थाना वये फइ। उकिं छफि हे जक तुफि छयला छस्वां बं पुइ मत्यः धयात:गु ख:।

यचुपिचु हिसाबं स्वयेगु ख:सा छै दुने व पिने यक्व पाइ। पिने गुलि फोहर जुइ, दुने उलि जुइमखु। पिने गुलि फोहर जुइ दुने उलि जुइमखु। पिनेया फोहर दुने वयेके सुयां यइमखु। पिने दुने वयेबल्य छुं छुं फोहर लाकामय बाय तति प्यपुना वयेफु। अथे जुया: वसिबं पुइबल्य पिखालखुतक पुइगु याइ। थ्व छगू लुखापिने डोरम्याट तयेथे ख:। थज्या:थाय बं पुइत अलग हे तुफि छयली। थन छयलागु तुफि मेथाय

छयलीमखु। छस्वां बं पुइबल्य थज्यागु समस्या व्यागलं जुइफइमखु।

बं पुइबल्य भचा धुसि लुया: पुइमा:। ताउत धुसि लुइबल्य जं त्यानुइ। तलनिसें पिने थ्यंक छस्वां बं पुइबल्य ताउत धुसि लुइमाली। अथे जुइबल्य त्यानुइगु जक मखु जं स्याये नं फु। बं पुइगु धयागु मिसापिसं याइगु ज्या ख:। मिसापिनि नं भौमस्त दतले माजुपित्त याकी मखु। न्हूपिं भौमस्त लात धायेवं त्यानु धाये छाली मखु। तं पतिं तुफि हिला: छस्वा मज्वीक बं पुइबल्य भचासां भासु लना: त्यानु लंके दइ।

परम्परागत लोकमान्यता कथं तलनिसें पिने पिखालखुतक छस्वां बं पुइगु धयागु छैया सुं नं ज: सीबल्य पुइगु या:। सीगु धयागु छुं नं ल्वचं सी। न्ह्यागुं ल्वय किटाणुतय पाखें जुइ। मनु सीसां ल्वयया कीत नष्ट जुइमखु। उबल्य आ:थें अस्पताल आदि थासय यंका: वास: यायेगु चलन मदु। मनु सीसां छैय हे सिकी। घाटय वाहेक मेथाय सित धायेवं भिं तायेकी मखु।



पन्नारत्न महर्जन

मनु सीसां छैय हे सिकी। घाटय वाहेक मेथाय सित धायेवं भिं तायेकी मखु। थज्यागु अवस्थाय मनु सीगु छैय ल्वयया कीत त्यानाच्वनीगु भय यक्व दइ। थज्या:पिं कीत उखेकुखें न्यने (छर य जुइ) मफयेकेत छफि हे तुफि तलनिसें पिने थ्यंक छस्वां बं पुना: छन्नइगु ख:।

सीगु धयागु दुखया खै ख:। थज्यागु दुख सुयात यइमखु। मय:गु दुख मवयेकेत थये याइगु ख:। सीबल्य जक याइगु ज्या जगुलिं नं थये याये मत्य: धयात:गु ख:। थ्व छु अन्धविश्वास मखु, छगू विज्ञान सम्मत ज्या ख:।

सीगु छैय बं पुइ धुंका: व तुफियात हाकनं छै दुने यंकी मखु। उकियात छ्वासय वायेगु ज्या याइ। छगू वैज्ञानिक अध्ययन कथं तुफिइ धू व किटाणुयात सोसय यानातयेकुगु क्षमता दु।



## मांयात सम्मान यायेगु नख: मांया ख्वा: स्वयेगु

श्रीकृष्ण महर्जन

### मांया ख्वा: स्वयेगु संस्कृति

थ: मांया ख्वा: स्वयेगु दिया रुपय नालात:गु नख: ख: मांया ख्वा: स्वयेगु दिं। चौलागा अमाई खुन्हु मांया ख्वा: स्वयेगु याइ।

मांया ख्वा: स्वयेगु दिनय मांं दनिपिन्सं विशेष याना इहिपा: मजुनिपिं म्हाय मस्त व काय मस्तयसं खें सगं विइगु नापं सा: सा:गु भिभिंगु नकेगु व वस: तकं थ: मांयात ल:ल्हायेगु याइ। अथे हे इहिपा: जुइ धुकूपिं म्हाय मस्तयसं ला भव्य ज्वरे याना थ:छैय वया मांयात खें सगं विइगु व भव्य नकेगु तकं याइ।

मांया ख्वा: स्वइगु इलय विशेष याना खें सगं विइगु याइ। खें सगं विइगु धइगु संघर्षवादी सिद्धान्त कथं जीवनय वइगु अनेक कथंया समस्यालिसे ल्वाये फयेमा धका: पञ्चतत्व ग्रहण याकेगु ख:।

### खें सगं विइगुया अर्थ

खें सगं विइगु धइगु नेवा: समाजय तसकं महत्वपूर्ण संस्कृति ख:। खें सगं धइगु पञ्चतत्व ग्रहण याकेगु ख:।



मानव शरिर पञ्चतत्व निर्माण जुयाच्वंगु धाइ। थ्व विश्व ब्रम्हाण्ड हे पञ्चतत्व निर्माण जुयाच्वंगु ख: धाइ।

पञ्चतत्व धइगु ल:, फय, पृथ्वी, आकाश व तेज तत्व ख:। थ्व न्यागू तत्त्व निर्माण जुयाच्वंगु शरीर जूगुलिं थकी मध्ये छगू जक तत्व म्हो जुल धा:सां म्ह मफइ अर्थात विरामी जुइ धाइ। थ्व हे न्यागू तत्वयात सन्तुलित याना तयेगु नितिं उकिया प्रतिक कथं पञ्चतत्व ग्रहण याकीगु धइगु हे खें सगं विइगु ख:।

खें सगंया भवलय ल: अर्थात जल तत्वया प्रतिक कथं लखय च्वनीम्ह न्याँ, फय अर्थात वायु तत्वया प्रतिक कथं मायव:, पृथ्वी तत्वया प्रतिक कथं छवय्ला, आकाश तत्वया प्रतिक कथं मनात:गु खें अले तेज

तत्वया प्रतिक कथं क्वा:ज: विइगु अय्ला: ल:ल्हाइगु ख:। उकिं मांया ख्वा: स्वयेगु दिनय मूल ज्या कथं खें सगं विइगु याइ नेवा:तयसं।

जीवनय न्ह्याथेजा:गु पंग:त व:सां चीका: वने फयेमा धका: संघर्षवादी सिद्धान्त ज्वना मांया ख्वा: स्वयेगु ज्या नेवा:तयसं याना वयाच्वंगु दु। न्ह्यागु हे धर्म नाला वयाच्वीपिं चाहे हिन्दू जुइमा वा बौद्ध जुइम्ह सकल नेवा:तयसं अ:पुक हे खें सगंयात स्वीकार याना वयाच्वंगु दु। उकिं नेवा: समाजय विशेष कथंया मौलिक संस्कृति दुगु अले थ:गु हे कथंया सिद्धान्त दुगु संस्कृति धइगु खें सगंया संस्कृति ख:।

### मां मदये धुकूपिन्सं निस्ला: विइगु

थ: मां मदये धुकूपिन्सं दच्छिया छन्हु जक जूसां नं थ: मांयात लुमंकेगु याना वयाच्वंगु दु। गुला तक प्वाथय तया जन्म विउम्ह अले म्हुतुइ थ्यने धुकुगुयात तक ल्हावाया नका त:धिक: या:म्ह थ: मांया गुणयात लुमंकेगु दिं धइगु मांया ख्वा: स्वये दिं ख:। थ: मांया गुणयात लुमंका: मदये धुकूम्ह मांयात धार्मिक रुपं श्रद्धा प्वंकेगु कथं

निसला: विइगु याना वयाच्वंगु। निसला: विइगु छगू संस्कृतिया रुपय नेवा: समाजय नालात:गु दु। थ:थ:गु छैय गुरुजुपिं वा य:बर्मूत स:ता: नापं गुरुजुपिन्थाय वा य:बर्मूपिन्थाय वना निसला: विइगु याइ। गुलि गुलिसिनं ला सरादे तकं याइगु चलन दु। अले गुं गुलिं मनूत धा:सा मातातिर्थय वना निसला विइगु नाप नापं स्नान यायेगु तकं याना वयाच्वंगु खने दु।

### मातातिर्थय मेला

मांया ख्वा: स्वायेगु दिनय यें जिल्ला दुने ला:गु दक्षिण पश्चिमपाखेया नेवा: वस्ती बालागामं च्वय ला:गु कुण्डय त:धंगु मेला जुइ। मां मदये धुकूपिं उगु कुण्डय वना स्नान यायेगु निसं सरादे यायेगु व निसला विइगु तकं याइ। व हे कुण्डयात हे मातातिर्थ धाइगु ख। न्हापा न्हापा मां मदये धुकूम्ह मनूयात थ:गु मांया लू मांया ख्वा: स्वयेगु दिनय उगु हे कुण्डय क्यंगु जुया हे मातातिर्थ धा:गु अले अबलेनिसं हे मेला जूगु ख: धाइगु जनविश्वास दु।

थौया अत्याधुनिक इलय नं मांया महत्व धा:सा अवश्य नं म्हो जुइमखु। छाय धा:सा मां धाइम्ह गुला तक प्वाथय तया



जन्म विउम्ह संसारय दक्ले अप्ठ: माया याइम्ह धाइम्ह हे मां ख:। थुगु खैय सुयां नं निगु मत दइ हे मखु। मांया गुणयात सुयागु नं गुणलिसे गबलें नं तुलना याये फइमखु। उकिं मांया गुणयात लुमंकेगु अले मांयात छगू कथं सम्मान यायेगु दिं धइगु हे मांया ख्वा: स्वयेगु दिं ख:। मांया ख्वा: स्वायेगु संस्कृति थौकन्हय मंका: परिवारय जक जुयाच्वंगु खने दुसां वास्तवय एकल परिवारय नं मालिसे ता ई तक तापाक्क च्वना च्वनीगु जुया भन अप्ठ: मांया गुणयात

लुमंकेगु ज्या यायेमाली। थ:त: जन्म याना विउम्ह मांयात लुमंकेगु दिं धइगु नेवा: समाय तसकं महत्व बियात:गु दुसा थौया इलय भन भन मांया ख्वा: स्वयेगु दिया महत्व अप्ठया व:गु दु। नेवा:तयसं संघर्षवादी सिद्धान्त कथं खें सगं विइगु थ:गु हे कथंया मौलिक संस्कृति ख:। थौया इलय नेवा: समाजय लसासे ल्यायम्हतयत तकं मांया ख्वा: स्वयेगु दिया महत्वयात थुइका वनेमा:गु आवश्यकता दु।





## बिचा: हायेका

जन्म :ने.सं.१०८० भाद्र



मदुगु : ने.सं.११६  
चौलागा एकादशी



मदुम्ह नन्दकाजी महर्जन

थुगु शहिद पथ बिचा: गुठीया सदस्य शहिदपथ, की.न.पा. वडा नं-११या नन्दकाजी महर्जन वंगु बैशाख २१ गते ५६ दँया बैशय दिवंगत जुयादीगुलिं मदुम्हेसिया सुखावति भुवनय् बास लायेमा धका: निर्वाण कामना यासें दु:खंक:पिं सकल छँज:पिन्सं मन चिइफयेमा धका: बिचा: हायेका च्वना ।

शहिद पथ बिचा: गुठी

शहिद पथ, पाँगा



## किपूया गथु प्याखं (गं मखा:गु प्याखं)

सफू बजारय् पिदने धुंकूगु दु थ:गु प्रति सुरक्षित यानादिसँ

सफू दइगु थाय्

- १) खपया च्याम्हसिंहया स्टेशनरी पस: (श्याम सुन्दरया पस:)
- २) खप कमल विनायकया स्टेशनरी पस:
- ३) किपूया सत:क्वया स्टेशनरी पस:
- ४) किपूया देय् पुगूया बाघभैरव स्टेशनरी पस:

- ५) किपूया पाँगा दोवाटोया किपू बूक प्वाइट
- ६) यँया भोताहित नातिबज्रया पस:
- ७) यँया कुलाभुलिइ च्वंगु मंका: धुकू पस:
- ८) यल, यल धवाखा अर्जुन स्टेशनरी पस:
- ९) स्वापू नितिं मेमेगु फोन नम्बर: ४३३४०१३, ९८४१७५२५८३, ९८४६०४६१२३९

मू  
सन्धि, तका जक (१००/-)

## बिचा: हायेका

जन्म :  
वि.सं.१९८९ चैत्र १५



स्व. भिन्यकुं महर्जन

मदुगु :  
वि.सं.२०७३ बैसाख १४



ज्यापु महागुथि किपू नगरसमितिया जन्मकाछि ज: इटाग्व:या रामचन्द्र डंगोलया मां भिन्यकुं महर्जन( भिम माया महर्जन) वंगु २०७३ बैशाख १४ गते ८४ दँय् दिवंगत जुयादीगुलिं वय्क:या सुखावती भुवनय् बास लायेमा धैगु निर्वाणया कामना यासे दु:खंक:पिं सकल छँज:पिन्सं मनचिइ फयेमा धका: बिचा: हायेका च्वना ।

ज्यापु महागुथि

किपू नगरसमिति, किपू

## बिचा: हायेका

जन्म :  
वि.सं.१९८९ चैत्र १५



स्व. भिन्यकुं महर्जन

मदुगु :  
वि.सं.२०७३ बैसाख १४



ज्वजलपा वा:पौया ग्वाहालिमि इटाग्व:या भाजु रामचन्द्र डंगोलया मां भिन्यकुं महर्जन (भिममाया महर्जन) ८४ दँया बैशय् वंगु २०७३ बैशाख १४ गते मदुगुलिं मदुम्हेसिया सुखावति भुवनय् बास लायेमा धका: निर्वाणया कामना यासें दु:खंक:पिं सकल छँज:पिन्सं मनचिइ फयेमा धका: बिचा: हायेका च्वना ।

ज्वजलपा वा:पौ

निखासी, न्हूबजा:, किपू-३